

1356

筠

谿

集

三



詳校官庶吉士臣瑚圖禮

侍讀臣孫球覆勘

總校官庶吉士臣倉聖脉

校對官典簿臣郭祚熾

謄錄監生臣劉能

謄錄監生臣查浩

欽定四庫全書

筠谿集卷五

宋 李彌遜 撰

外制

劉大中禮部尚書

朕眷有家之多難乘大業之將興敷求真賢共濟當務
矧居常伯之任實高法從之班允副疇咨孰先舊德具
官某智周而密學富而通直諒之誠言斯可績劉大之
氣見於有為早推吏道之師旋陟禁林之表繡衣諭俗

問不及於狐狸皂蓋臨民名亦知於草木惟汲黯可攘
於敵國而望之久去於本朝想閑曳履之聲亟下賜環
之命典朕三禮位予六卿詢之僉言莫如汝作大事則
從其長既不溺於情文衆美以效之君尚勿忘於啟沃
益輸忠讜以迓寵光

馮義由解圍番賊轉兩官

排難解紛見臣子保邦之節報功崇德為人君馭衆之
恩爾素敦詩書晚從金革遭時多難報國一身有嘉乘

郭之功肆頒增秩之命保茲榮寵毋怠欽承

胡舜陟買馬及額轉一官

國家偃武之久歸馬不閑興師有年折箠可渡而猶務
益之將以制胡虜之長技非得已也具官某風猷敏濟
器度閎深久踐禁林出分帥閩惟桂林象郡旁連多馬
之野歲取駿良厥有常數乃能率下應期不擾而集既
富在垌之牧無煩請苑之師雖曰守官實為體國宜載
加於命秩以昭示於渙恩尚服寵光益思忠蓋

劉公達轉一官

仗節守誼者臣之忠信賞必罰者君之柄爾臨難有守
不與賊俱姑進一階以為衆勸往服予命益勵汝為

程江軍使游輔起復

墨經以從王事於古有之方時多艱禦侮之寄非人不
可爾却敵摧堅有功百里以憂去位亦既踰時其奪苦
塊之情勉從軍旅之政事君之義移孝為忠益勵遠圖
佇觀來効

張戒兵部郎官

尚書郎朝廷之高選近歲官不必備率以他曹通掌非
開敏博達兼人之才不以居是職也爾器識深閎操履
純固頃繇儒館出領使華中臺武部之屬姑試之事以
觀汝能其勵乃躬率乃職稱朕所以選任之意焉

楊晟惇換給事中大夫直徽猷閣

朕惟師老敵堅士苦於戰有功必錄凡賞無常而況於
發縱指示御衆制勝者哉爾素敦詩書深明韜畧振斬

將搴旗之旅收執俘獲醜之功比命相臣付以閫外之事而崇階華職併以命爾載疇勲庸良見忠蓋肆頒綸綍之寵以為閎閎之光尚體眷懷益輸奇節

陳師錫贈諫議大夫

江河競注仰太華之彌高玉石俱焚見精金之百鍊士有所守何獨不然具官某操尚端方風規峻整當先帝龍飛之運為中朝骨鯁之臣旋被謗傷遂連鉤黨惟人心之助信亦天道之好還念彼同升既追榮於禁路豈

容遺直獨銜憤於幽局是用寵以諫垣躋之法從嗟乎
弗及見賈生而席前尚其有知從朱游於地下諒惟英
爽歆此哀榮

淮西運判梁澤民直祕閣

使臣以禮則忠有功見知則說朕於用人苟藉其才先
之以寵而責其效可謂至矣爾儒雅飾吏從政有方比
命從臣推擇實材而奏書來上僉曰汝能內閣圖書之
府也往參其直朕之所以待汝豈特飛輓之事哉其體

茲意益慎厥脩

張球等轉一官

魯人以思斯才頌僖公能遵伯禽之業比命方伯市駿
桂林象郡之間而爾令行千里勸督有方致其土地之
宜相予軍旅之事載嘉體國可後酬庸超進一階以示
褒勸

唐時轉一官

朕詠鴻雁之章修安集之政慎選百里惠養元元以盡

為民父母之道爾涖官江縣聲聞於朝部使者謂爾奉
公潔已戢吏恤民徭役均平催科不擾有令如此朕於
斯民無負矣何惜一官不為爾勸哉

梁澤民淮西運判

朕眷淮右瘡痍之餘蠲其賦斂飛芻他道以給軍食部
使者之職惠養斯民安集之爾才學之優習於吏治周
旋外服灼知民艱其為朕往撫彫瘵之方奉法繩吏去
其害民使流庸自占經界復興庶幾還其舊俗克祗厥

事嗣有寵嘉

王震湖南運判

朕撫御遠民如行宮庭之政異時遣使問俗休戚必聞
時巡以來急調度而緩農事非朕意也爾才優敏強習
於吏治周旋外服益見所長荆湘轉輸之任其為朕往
惟奉法繩吏去其害民使下不擾而賦用足斯為稱職
尚往欽哉

晁謙之再任福建運判

甌閩地偏而俗悍吏鮮奉法刺舉之任一不得人則民
不勝其弊爾以才猷蚤見推擇繡衣虎節歲滿政成吏
姦民隱俱在目中矣是用因爾之能以順民望申命爾
以轉輸之任爾其益勵遠業以繼前功毋以久於其官
而怠乃事也

蕭振浙西提刑

朕禮遇庶工孝治天下欲為臣者必獲乎上懼為子而
不得乎親用捨之間姑從其欲爾以端亮方嚴任予耳

目之寄而抗章有請以親為辭卻之復來志不可奪夫
遠而有光華可以榮親必也使無訟乃能善俗其推錫
類之誠以施及人之惠體茲明訓往務欽承

魏永昇換給武翼郎

朕念師老敵堅士卒苦戰有功必錄不以疑廢爾久於
行陣累賞得官執符而來不加考覆而易以真命可謂
優矣其勉爾忠以圖報稱

衡嗣興補承信郎

仗節死諠知命者所難爾父忠勇帥衆至於隕身朕甚
憫焉既峻其秩復命爾官恩則厚矣其思所以保之

趙成之改合入官

縣令近民而遠於朝廷劇責衆有功難於上達比遣信
臣察其勤惰以聞而黜陟之爾效官百里實在盜區治
狀卓然達於予聽朕觀其所為主而又延見便朝益信
其行矣錫之命秩非曰示恩亦俾爾識朕見知之意益
自勵焉